

Pero ta necesario pa Valero entrega e facilidadnan

UPP contento cu Camara di Comercio tambe ta apoya desaroyo di San Nicolas

ORANJESTAD - Cu hopi interes UPP a sigui e conferencia di Camara di Comercio tocante Aruba sin refineria. Ya caba aña pasa, na momento cu Valero a anuncia su cierre y despues na november a termina trabou di su trahadonan, UPP a duna su opinion cla y raspa, esta cu mester cuminsa pensa riba un direccion nobo di un Aruba sin refineria.

Asina e partido ta relata den un comunicado. UPP e tempo ey a propone pa muda e waf di carga for di Playa pa San Nicolas, enves di muda esaki pa Barcadera. Tambe UPP a propone pa bini cu industrianan limpi na San Nicolas y di tecnologianan avansa (por ehempel un industria di remedi), y un industria turistico, pero basa riba esun medico. UPP a sugeri tambe pa muda pa San Nicolas e centro di gobernacion, hunto cu algun departamento di gobierno, cu de inmediato lo a trece bida pariba di brug. Ya caba den e gobernacion anterior mi a muda Inspeccion di Medicina pa San Nicolas, mi a habri un oficina di SVB, y desde februari 2006 mi ministerio tabatin su sede den e edificio "biu" di centro medico.

Nos a construi un joya di un hospital super specialisa riba tereno cardio-vascular, sin embargo e gobierno aki a laga cera e hospital aki y a haci'e un simpel Centro Medico atrobe.

"E gobierno aki por a sigui mi ehempel, y sigui trece bida den San Nicolas. Lamentablemente nos por mira cu mas cu un aña a pasa sin cu nada concreto a wordo haci. Gobierno ainda ta papia di manda e waf pa Barcadera" Wever

a bisa den un comunicado. Despues di e acuerdo cu Gobierno di Aruba a cera cu Valero na 2010, unda cu a regala Valero mas di 70 miyon florin cu ta toca e pueblo di Aruba, Valero a dal sera un dia, y awor tin casi 3 aña ta evaluando pa dicidi kico e ta haci. Cu un areglo asina Valero tin Gobierno di Aruba secuestra pa cualkier desaroyo cu gobierno lo kier bin cun'e. Tambe Valero tin Aruba y particularmente e pueblo di San Nicolas depriva di cualkier desaroyo economico. Esey ta loke Mike Eman y su gobierno a duna e pueblo di San Nicolas. UPP ta kere cu ta imperativo cu pa cualkier desaroyo pa San Nicolas y pa Aruba, ta necesario pa Valero entrega, no despues di 3 aña sino awor aki mes, e facilidadnan cu e tin secuestra, en espera pa wak ki beneficianan lo e por haya for di e situacion aki. Sin esaki, e esfuersonan di Camara di Comercio of cualkier otro grupo, ta envano. Pasobra lo mester warda te na 2015 pa e facilidadnan aki wordo traspara.

Es mas, loke nan ta entrega ta e parti di e refineria, mientras cu esun di transshipment si ta keda den nan man. Esaki tampoco no ta sano pa cualkier desaroyo cu lo kier bin cun'e na e sitio. Pues pa UPP ta importante pa Valero entrega tur facilidadnan, mirando cu primariamente nan permiso ta pa maneha un refineria. "Nos sa cu gran parti di e mundo politico tin miedo di bisa cu nan ta descarta cualkier reapertura di refineria, pa motibo di por perde voto. Pero nos mester ta realistico, mas tempo nos warda, mas atras e facilidadnan ta bay" Wever ta sigui bisa den su comunicado.



Entretanto e refineria tin mas cu un aña cu e no ta den funcion y defacto ya nos ta bibando sin refineria.

For di e plannan cu a wordo presenta pa Camara di Comercio, nos por mira tambe cu Gobierno di Aruba no a pone

atencion na San Nicolas.

Entre otro ta wordo papia di un Convention Center. Gobierno di Mike Eman y Mike de Meza tabatin un oportunidad unico, pa pone e auditorio cu ta bay bin na Kennedyschool, na San Nicolas. Pero e stimacion real ta keda pa Playa, unda awor nos ta haya dos auditorio banda di otro. Esta Cas di Cultura (competencia) y Kennedyschool. "UPP ta enfatisa di ta apoya un desaroyo nobo cu Camara di Comercio ta presenta pa San Nicolas, pero ta kere cu esaki mester ta sin mas tardanza.

San Nicolas tambe merece miho!" Wever ta finalisa den su comunicado. □

